

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**Z A K O N**

**O IZMJENAMA I DOPUNAMA ZAKONA O REGISTRACIJI POSLOVNIH  
SUBJEKATA U FEDERACIJI BOSNE I HERCEGOVINE**

**Sarajevo, oktobar 2020. godine**

## ZAKON

### O IZMJENAMA I DOPUNAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE

#### Član 1.

U Zakonu o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05, 43/09 i 63/14), član 3. mijenja se i glasi:

#### „Član 3.

(Značenje pojedinih izraza upotrijebljenih u Zakonu)

Izrazi koji se koriste u ovom zakonu imaju slijedeće značenje:

- 1) **Registar** - je baza podataka koja sadrži podatke i isprave o subjektima upisa koji su obavezni registrovati se u skladu sa odredbama ovog zakona, a sastoji se od glavne knjige registra i zbirke isprava registra.
- 2) **Registarski sud** - svaki sud nadležan za poslove registracije i kao takav označen posebnim zakonom Federacije.
- 3) **Nadležni registarski sud** - sud nadležan za upis u registar subjekta upisa koji se određuje prema sjedištu subjekta upisa.
- 4) **Jednošalterski sistem** - sistem pružanja usluga podnosiocima prijave na jedinstvenoj fizičkoj ili virtuelnoj lokaciji u postupku registracije poslovnih subjekata kod nadležnog registarskog suda, postupcima dodjeljivanja jedinstvenog identifikacionog broja i registracije kod nadležnog poreznog organa, razvrstavanja pravnog lica prema klasifikaciji djelatnosti kod nadležnog organa za razvrstavanje subjekata po djelatnostima, kao i upisa u registar carinskih obveznika, i registar obveznika indirektnih poreza kod nadležne uprave za indirektno oporezivanje ukoliko za to postoje tehničke i organizacijske mogućnosti.
- 5) **Sistem registra** - informacioni sistem koji služi za registraciju poslovnih subjekata, elektronsku komunikaciju i razmjenu podataka između: učesnika u postupku registracije svih registarskih sudova, registrom godišnjih finansijskih izvještaja Finansijsko-informatičke agencije, Poreznom upravom Federacije Bosne i Hercegovine, Upravom za indirektno oporezivanje, Federalnim zavodom za statistiku i nadležnim općinskim službama za upravu.
- 6) **Jedinstvena baza registra** - je dio sistema registra koji služi kao centralno mjesto za pohranjivanje registarskih, evidencijskih i statističkih podataka registarskih sudova, kao i isprava i drugih dokaza pohranjenih u elektronskom obliku u zbirku isprava.
- 8) **Glavna knjiga registra** - javni dio sistema registra koji sadrži podatke o subjektima upisa propisane ovim zakonom, a vodi se u elektronskom i štampanom obliku. Glavnu knjigu registra u elektronskom i štampanom obliku vodi sud nadležan prema sjedištu poslovnog subjekta. Elektronski oblik glavne knjige čine podaci sudskog registra u elektronskome obliku propisani ovim zakonom i drugim propisima. Štampani oblik glavne knjige čine podaci sudskog registra u pisanom obliku propisani

ovim zakonom i drugim propisima, a sastoji se od aktivnog i pasivnog dijela. Aktivni dio glavne knjige sadrži se od aktualnih podataka sudskog registra, a pasivni dio glavne knjige sadrži podatke o prethodnim upisima.

9) **Zbirka isprava registra** - dio registra koji sadrži isprave na osnovu kojih je izvršen upis podataka o subjektima upisa u glavnu knjigu registra, kao i druge dokaze dostavljene i sastavljene u postupku upisa u registar, kao i odluke donesene u postupku upisa u registar.

10) **Subjekt upisa** - poslovni subjekt, odnosno pravno lice čiji je upis obavezan po ovom zakonu. To je privredno društvo osnovano sa ciljem obavljanja privredne djelatnosti, javno preduzeće, zadruga ili zadružni savez i drugo pravno lice koje se osniva u skladu sa zakonima Federacije, a radi sticanja dobiti. Subjekti upisa, u smislu ovog zakona, su i subjekti čiji je upis određen posebnim zakonom Federacije.

11) **Matični broj subjekta upisa** (u daljem tekstu: MBS) - jedinstveni evidencijski identifikacioni broj koji svakom subjektu upisa prilikom upisa u registar dodjeljuje nadležni registarski sud. MBS je jedinstven, nepromjenjiv i neponovljiv u registarskom sudu, osim u slučaju promjene oblika organizovanja i sjedišta subjekta upisa na područje drugog registarskog suda, uz obavezno navođenje prethodno dodijeljenog MBS subjekta upisa. Koristi se kao stalna oznaka poslovnog subjekta u registru i kod povezivanja podataka o poslovnim subjektima sadržanih u drugim registrima i evidencijama.

12) **Upis u registar** - registracija, (svaki) upis ili izmjena jednog ili više podataka od značaja za pravni promet u glavnu knjigu registra.

13) **Brisanje iz registra** - svaki unos čije je značenje prestanak subjekta upisa odnosno prestanak važenja pojedinačnog podatka upisanog u glavnoj knjizi registra vezanog za pojedinačni subjekt upisa.

14) **Učesnik u postupku registracije** - lice koje je pokrenulo postupak registracije, lice o čijim se pravima i pravnim interesima odlučuje u postupku, te nadležni organ. Predlagač, u smislu ovog zakona, jeste subjekt upisa odnosno drugo lice po čijem se prijedlogu pokreće postupak za upis u sudski registar, a protivnik predlagača je subjekt upisa prema kojem se ostvaruje zahtjev istaknut u prijedlogu.

15) **Podnosilac prijave** - učesnik u postupku registracije koji je pokrenuo postupak registracije, odnosno lice koje je potpisalo prijavu za registraciju, odnosno prijedlog, a odnosi se na osnivača koji podnosi prijavu, odnosno lice ovlašteno osnivačkim aktom, generalnom odnosno specijalnom punomoći ili na osnovu drugog pravnog osnova, da podnese prijavu za upis u sudski registar.

16) **Izvod iz registra** - ovjerena isprava koja se izdaje na zahtjev zainteresovanog lica na propisan način, a sadrži aktuelne podatke (aktuelni izvod iz sudskog registra), odnosno pored aktuelnog i sve prethodno upisane podatke (historijski izvod iz sudskog registra), koji se nalaze u glavnoj knjizi registra za pojedinačnog subjekta upisa.

19) **Evidencija podružnica drugog registarskog suda** - podaci o podružnicama čije je sjedište subjekta upisa na području drugog registarskog suda.

20) **Evidencija podružnica stranog društva** - podaci o podružnicama stranih društava.“.

### **Član 2.**

U članu 4. stav (1), tačka 8), mijenja se i glasi:

„8) **javnosti** - svako može, bez dokazivanja pravnog interesa, izvršiti uvid u podatke upisane u glavnoj knjizi registra i javne podatke iz zbirke isprava registra, osim isprava za koje je zakonom isključena primjena principa javnosti registra, te zahtijevati da mu se izda izvod odnosno prepis javnih podataka iz glavne knjige registra, a jedino se zakonom propisuje kada je za uvid ili za pribavljanje izvoda iz zbirke isprava registra nužno dokazivanje pravnog interesa.“.

### **Član 3.**

U članu 5. stav (1) iza riječi „drugim“ dodaje se riječ „posebnim“.

### **Član 4.**

Član 7. mijenja se i glasi:

#### **„Član 7.**

(Predmet registracije)

(1) U registar se upisuje: osnivanje i brisanje subjekta upisa, osnivanje odnosno brisanje dijela subjekta upisa (podružnica ili poslovna jedinica), sve statusne promjene uključujući promjene oblika organizovanja subjekta, podaci o povezanim društvima, podaci o subjektu upisa koji su od značaja za pravni promet i njihova izmjena, podaci u vezi sa prestankom, stečajnim odnosno likvidacionim postupkom, podaci o pokretanju postupka brisanja subjekta registracije, kao i drugi podaci utvrđeni ovim kao i drugim zakonima Federacije.

(2) Pored podataka iz stava (1) ovog člana u registar se upisuje zabrana obavljanja djelatnosti i upisa drugih činjenica na osnovu pravosnažnog rješenja nadležnog organa, privremene mjere odnosno zabilježbe o odlukama donesenim u skladu sa drugim propisima.“.

### **Član 5.**

U članu 8. dodaju se novi st. (9), (10), (11), i (12), koji glase:

„(9) Predsjednik registracionog suda i nadležna služba Vlade Federacije Bosne i Hercegovine u kojoj je smješten sistem registra dužni su sprovoditi mjere osiguranja i zaštite pohranjivanja podataka, kao i mjere održavanja i provjere ispravnosti rada elektronskog sistema.

(10) Osiguranje neophodnih kadrovskih, tehničkih i organizacionih uslova funkcionisanja sistema registra, kao i za tačno i ažurno pohranjivanje podataka u jedinstvenu bazu te uredno provođenje mjera sigurnosti, u nadležnosti je predsjednika suda.

(11) Svaka dostava podataka elektronskim putem van zaštićene mreže sudova koja kao posljedicu ima upis podataka u jedinstvenu bazu sudskog registra mora biti kriptirana i zaštićena od neovlaštenih izmjena od strane trećih lica.

(12) Svaki prenos podataka elektronskim putem van zaštićene mreže sudova iz jedinstvene baze sudskog registra u druge sisteme mora biti kriptiran i zaštićen od neovlaštenih izmjena od strane trećih lica.“.

## **Član 6.**

Član 10. mijenja se i glasi:

### **„Član 10. (Sadržaj registra)**

(1) Registar se sastoji od glavne knjige i zbirke isprava registra. Nadležni registarski sud vodi glavnu knjigu registra i zbirku isprava za svakog pojedinačnog subjekta upisa.

(2) Glavna knjiga registra je knjiga podataka koja se istovremeno vodi u štampanom i elektronskom obliku. Glavna knjiga registra u štampanom obliku vodi se u nadležnom registarskom sudu. Glavna knjiga registra u elektronskom obliku dostupna je svim registarskim sudovima u Bosni i Hercegovini.

(3) Nadležni registarski sud dužan je osigurati da je konačan upis u glavnu knjigu registra trenutno dostupan svim registarskim sudovima na teritoriji Bosne i Hercegovine.

(4) U momentu predaje prijave za registraciju podaci koji su dostupni ograničeni su na momenat predaje prijave i firmu prijavljenu za registraciju. Nakon okončanog postupka registracije odnosno nakon donošenja rješenja o registraciji svi podaci sadržani u glavnoj knjizi registra dostupni su u skladu sa odredbom st. (2) i (3) ovog člana.

(5) Glavna knjiga registra u elektronskom obliku vodi se putem jedinstvenog informacionog sistema.

(6) Glavna knjiga vodi se tako da se podaci upisani u registarskom sudu pripremaju i pohranjuju u jedinstvenu bazu podataka.

(7) U jedinstvenu bazu podataka mora biti pohranjen svaki upisani podatak. Upisi kojima svi ili određeni podaci o subjektu prestaju važiti, moraju ostati dostupni za pretraživanje putem MBS-a i firme toga subjekta.

(8) Zbirka isprava registra vodi se u štampanom, a može i u elektronskom obliku.

(9) Registarski sudovi odgovaraju za vjerodostojnost izvršenog upisa.

(10) Vlada Federacije Bosne i Hercegovine donijet će propis kojim će se urediti vođenje registra, osiguranje, upotreba i čuvanje sadržaja registarskih podataka, vođenje zbirke isprava u elektronskom obliku, kao i pretvaranje isprava pohranjenih u zbirci isprava na papiru u elektronski oblik.“.

## **Član 7.**

Iza člana 10. dodaje se član 10a., koji glasi:

### **„Član 10a.**

(Internet stranica sudskog registra)

(1) Internet stranica sudskog registra je dio sistema registra putem koje je omogućeno pretraživanje i uvid u javne podatke iz glavne knjige kao i javno objavljene podatke o sadržaju provedenih upisa u registar, odnosno javno objavljene odluke za koje je zakonom ili odlukama registarskog suda određeno da će se objaviti na način na koji se objavljuju upisi u sudski registar.

(2) Internet stranici registra pristupa se preko interneta na internet adresi, a pretraživanje podataka provodi se putem izbornika internet stranice registra.

(3) Podaci iz javnih objava objavljeni na internet stranici registra moraju godinu dana ostati dostupni za pretraživanje.

(4) Uvid u javne podatke glavne knjige kao i javno objavljene podatke putem internet stranice sudskog registra besplatan je.“.

## **Član 8.**

U članu 22. stav (1), iza tačke 9) dodaje se nova tačka 10), koja glasi:

„10) Ovjerenu izjavu iz člana 6. stav (2) Zakona o privrednim društvima, kojom se garantuje ispunjenost uslova za obavljanje djelatnosti;“.

Dosadašnja tačka 10) postaje tačka 11).

## **Član 9.**

Član 48. mijenja se i glasi:

### **„Član 48.**

(Podnošenje prijave za registraciju)

(1) Postupak upisa u registar pokreće se prijavom u štampanom obliku ili elektronskom prijavom, potpisanom u skladu sa propisima koji regulišu elektronski dokument i elektronski potpis.

(2) Osnivači subjekta upisa prijavu za registraciju predaju lično ili putem ovlaštenog predstavnika/zastupnika, odnosno punomoćnika. Punomoćnik podnosioca prijave može biti advokat ili notar.

(3) Prijava za upis u registar može biti predata neposredno registarskom sudu, elektronskim putem i putem pošte.“.

## **Član 10.**

Član 49. mijenja se i glasi:

„Član 49.

(Obrazac prijave)

(1) Podnosilac prijave za registraciju subjekta upisa podnosi popunjen i potpisan obrazac prijave za registraciju, zajedno sa potrebnim ispravama.

(2) Prijava sadrži zahtjev za upis svih obaveznih općih i posebnih podataka odnosno njihovih promjena u sudski registar.

(3) Pored podataka iz stava (2) ovog člana, prijava za registraciju sadrži pretežnu djelatnost subjekta upisa i druge podatke potrebne za provođenje postupka razvrstavanja pravnog lica prema klasifikaciji djelatnosti kod nadležnog organa za razvrstavanje subjekata po djelatnostima, postupka dodjeljivanja jedinstvenog identifikacionog broja i registracije kod nadležnog poreznog organa i po potrebi postupaka upisa u registar carinskih obveznika i registar obveznika indirektnih poreza kod nadležne uprave za indirektno oporezivanje.

(4) Obrazac prijave za registraciju dostupan je u registarskom sudu i na odgovarajućim internet stranicama i ne može biti predmet trgovine.

(5) Uz prijavu za registraciju, podnosilac prijave istovremeno predaje potrebne isprave utvrđene u članu 22. ovog zakona, u originalu ili ovjerenj fotografiji.

(6) Izuzetno od stava (5) ovog člana, dokumenti u prilogu elektronskog obrasca prijave za registraciju dostavljaju se elektronski sa kvalifikovanim elektronskim potpisom i pečatom organa koji je izdao takav dokument u formi elektronskog dokumenta.

(7) Podatke iz st. (2) i (3) ovog člana, kao i isprave iz st. (5) i (6) ovog člana, podnosilac prijave nije u obavezi dostaviti u slučaju kada je za potrebe dokazivanja ispunjenosti uslova za registraciju, nadležni registarski sud u mogućnosti koristiti podatke iz registara drugih organa, kao i podatke koji proizlaze iz kvalifikovanog elektronskog certifikata odnosno korisničkog naloga podnosioca prijave.“

## **Član 11.**

Iza člana 49. dodaje se novi član 49a. koji glasi:

„Član 49a.

(Postupak elektronske registracije)

(1) Prijava u postupku elektronske registracije podnosi se na elektronskom obrascu prijave za registraciju, u okviru korisničkog naloga, uz koji se prilažu isprave u formi elektronskog dokumenta.

(2) Kada se prijava podnosi elektronskim putem, provjera identiteta podnosioca prijave, kao i provjera registarskih isprava vrši se u skladu sa propisima kojima se uređuje elektronski potpis i elektronski dokument.

(3) U postupku elektronske registracije nadležni registarski sud donosi odluke elektronski potpisane od strane registarskog sudije i ovjerene elektronskim pečatom registarskog suda, koje se u formi elektronskog dokumenta, kao i druge isprave potrebne za obavljanje djelatnosti subjekta upisa dostavljaju podnosiocu prijave.

(4) Registarski sud pored odluke u formi elektronskog dokumenta iz stava (3) ovog člana, podnosiocu prijave izdaje i rješenje o upisu subjekta upisa u registar u štampanom obliku.

(5) Svi dokumenti izdati od strane nadležnog registarskog suda u postupku elektronske registracije imaju svojstvo javne isprave i ne može im se osporiti pravna punovažnost zbog činjenice da su izdati u formi elektronskog dokumenta.

(6) Federalno ministarstvo pravde donijet će pravilnik kojim će bliže propisati uslove i postupak elektronske registracije, kao i sadržaj, oblik i način popunjavanja prijave za registraciju.“

## **Član 12.**

Član 50. mijenja se i glasi:

### **„Član 50.**

(Postupak po prijemu prijave)

(1) Po prijemu prijave za registraciju sud provjerava identitet podnosioca prijave, isključivost firme subjekta registracije i uplatu takse.

(2) Prijava za registraciju u elektronskom obliku dostavlja se odmah po njenom prijemu poreznom organu, Federalnom zavodu za statistiku i, prema potrebi carinskom organu nadležnom prema mjestu sjedišta subjekta upisa radi pribavljanja poreznog identifikacionog broja i carinskog broja.

## **Član 13.**

Član 59. mijenja se i glasi:

### **„Član 59.**

(Izgled i sadržaj rješenja o registraciji)

(1) Rješenje o upisu u registar i izvod izdaje se u materijalnom i elektronskom obliku na obrascu koji sadrži osnovne podatke o subjektu upisa.

(2) Rješenje u materijalnom obliku sadrži naziv i pečat nadležnog registarskog suda, ime i prezime sudije, datum donošenja rješenja, opće i posebne podatke utvrđene ovim zakonom.

(3) Rješenje o elektronskom obliku sadrži elektronski potpis u skladu sa zakonom o elektronskom dokumentu i zakonom o elektronskom potpisu, kao i naziv nadležnog registarskog suda, ime i prezime sudije, datum donošenja rješenja, opće i posebne podatke utvrđene ovim zakonom.

(4) Rješenje o upisu subjekta upisa u registar sadrži MB koji softver automatski generiše prilikom otvaranja novog dosijea poslovnog subjekta kod suda, JIB dodijeljen od nadležnog poreznog organa Federacije i carinski broj, odnosno porezni



identifikacioni broj za poslovne subjekte koji se registruju za obavljanje vanjskotrgovinskog poslovanja dodijeljen od uprave za indirektno oporezivanje Bosne i Hercegovine, ako je pribavljen.

(5) Rješenje kojim se odbija zahtjev ili odbacuje prijava podnosioca prijave ili ako se istim rješava o prijedlozima učesnika koji su međusobno suprotni, obavezno sadrži uvod, izreku i obrazloženje i izdaje se u materijalnom i elektronskom obliku.

(6) Rješenje o registraciji važi na teritoriji Bosne i Hercegovine nezavisno o tome gdje je izvršena registracija.“.

#### **Član 14.**

Član 60. mijenja se i glasi:

„Član 60.  
(Zaključak)

Zaključak se izdaje u materijalnom i elektronskom obliku i sadrži podatke iz člana 59. st. (2) i (3) ovog zakona kao i naziv subjekta upisa i predmet prijave, nalog subjektu upisa da u određenom roku, koji ne može biti kraći od tri niti duži od 15 dana, otkloni utvrđene nedostatke prijave, odnosno ispravi ili pribavi određene isprave od nadležnog organa, odnosno institucije, kao i pravne posljedice nepostupanja po zaključku.“.

#### **Član 15.**

U članu 68. stav (3) mijenja se i glasi:

„(3) Zahtjev iz stava (2) ovog člana može se podnijeti u roku od 15 dana od dana saznanja za upis, a najkasnije u roku od 90 dana od dana objavljivanja na oglasnoj tabli suda i internet stranici registra.“.

#### **Član 16.**

U članu 73. u stavu (1) iza riječi: „Službenim novinama Federacije BiH“ dodaju se riječi: „internet stranici registarskog suda“.

#### **Član 17.**

Član 74. mijenja se i glasi:

„Član 74.  
(Dostavljanje poreznog identifikacionog broja i razvrstavanje subjekata po djelatnostima)

(1) Prijavu za upis osnivanja subjekta upisa i upis dijela subjekta upisa sud će odmah putem sistema registra dostaviti nadležnom organu za razvrstavanje subjekata po djelatnostima radi razvrstavanja subjekta upisa prema klasifikaciji djelatnosti i nadležnom poreznom organu prema sjedištu subjekta upisa radi dodjeljivanja identifikacionog broja i porezne registracije.

(2) Nadležni organ za razvrstavanje subjekata po djelatnostima dužan je izvršiti razvrstavanje subjekta upisa prema djelatnosti u roku od jednog radnog dana od dana prijema prijave za registraciju i o tome putem jedinstvenog informacionog sistema obavijestiti nadležni porezni organ i nadležni registarski sud.

(3) Nadležni porezni organ dužan je putem jedinstvenog informacionog sistema dostaviti porezni identifikacioni broj odnosno podbroj u roku od jednog radnog dana od dana prijema prijave za registraciju ili obavijestiti sud o razlozima nedostavljanja poreznog identifikacionog broja odnosno podbroja.

(4) Razlog za odbijanje izdavanja poreznog identifikacionog broja može biti postojanje poreznog duga osnivača subjekta upisa.

(5) Ako nadležni porezni organ ne dostavi porezni identifikacioni broj i podbroj u ostavljenom roku, sud neće donijeti rješenje o registraciji poslovnog subjekta.

(6) Sud će izdati rješenje o registraciji subjekta upisa po dostavljanju poreznog broja, bez dodatnih troškova po subjekta upisa. U slučaju da se porezni identifikacioni broj ne dostavi u roku od sedam dana od dana podnošenja prijave sudu, sud će odbaciti prijavu.

## **Član 18.**

Član 76. mijenja se i glasi:

### **„Član 76.**

**(Obavezna obavještenja)**

(1) Nadležni registarski sud rješenje o registraciji osnivanja odnosno statusne promjene poslovnog subjekta po donošenju dostavit će:

1) Poreznom organu nadležnom prema sjedištu subjekta upisa - Upravi za indirektno oporezivanje.

2) Nadležnoj općinskoj službi za upravu i kantonalnom organu uprave nadležnom za poslove privrede, prema sjedištu subjekta upisa.

3) Federalnom zavodu za statistiku i privrednoj komori.

4) Zavodu za penziono i invalidsko osiguranje prema sjedištu subjekta upisa radi registracije.

5) Carinskom organu nadležnom prema mjestu sjedišta subjekta upisa, ukoliko je subjekt upisa registrovan za vanjskotrgovinsko poslovanje.

6) Nadležnim regulatornim organima u skladu sa posebnim propisima koji utvrđuju uslove i izdaju dozvole, odnosno odobrenja za obavljanje pojedinih djelatnosti, ako je subjekt upisa registrovan za takvu djelatnost.

7) Finansijsko informatičkoj agenciji FIA-i.

(2) Nadležnoj općinskoj službi za upravu i kantonalnom organu uprave nadležnom za poslove privrede, prema sjedištu subjekta upisa obavezno se, uz rješenje o registraciji osnivanja odnosno statusne promjene poslovnog subjekta, dostavlja i izjava iz člana 6. stav (2) Zakona o privrednim društvima.

(3) Rješenje o registraciji osnivanja u elektronskom obliku, odnosno statusne promjene poslovnog subjekta po donošenju, bit će dostupno elektronskim putem svim subjektima navedenim u stavu (1) ovog člana.“.

## **Član 19.**

Član 78. mijenja se i glasi:

### **„Član 78.**

(Izdavanje izvoda iz registra)

(1) Svi registarski sudovi u Federaciji dužni su omogućiti svakom zainteresovanom licu uvid u podatke glavne knjige registra, odnosno izdati izvod iz glavne knjige registra nezavisno od nadležnosti tog suda za registraciju subjekta upisa.

(2) Nadležni registarski sud koji vodi glavnu knjigu registra, na zahtjev lica ovlaštenog za zastupanje subjekta upisa odnosno člana organa upravljanja poslovnog subjekta odnosno nadležnog državnog organa, dužan je izdati izvod iz registra.

(3) Izvod iz registra predstavlja javnu ispravu.

(4) Uvid u isprave i druge akte iz zbirke isprava subjekta upisa može se izvršiti ako za to postoji opravdan pravni interes, uz odobrenje ovlaštenog lica i uz prisustvo ovlaštenog službenika suda.

(5) Zahtjev za izdavanje izvoda iz registra podnosi se nadležnom registarskom sudu, podnosioci zahtjeva isti preuzimaju u sudu uz dokaz uplate takse, ako je ona posebnim propisom predviđena.“.

## **Član 20.**

U članu 81. stav (2) mijenja se i glasi:

„(2) Ukoliko nadležni registarski sud utvrdi da nisu ispunjeni svi formalni i materijalni uslovi za upis u sudski registar, pozvat će predlagaoca da u roku od tri dana otkloni uočene nedostatke, a ukoliko predlagaoc ne postupi u navedenom roku, donijet će rješenje o odbacivanju prijave.“.

## **Član 21.**

Član 82. mijenja se i glasi:

### **„Član 82.**

(Objavljivanje rješenja o registraciji)

(1) Pravosnažno rješenje o registraciji se bez odlaganja objavljuje na oglasnoj tabli suda i internet stranici registra.

(2) Smatra se da je upis objavljen istekom jednog dana od dana objavljivanja u skladu sa stavom (1) ovog člana.

## **Član 22.**

Član 84. mijenja se i glasi:

### **„Član 84.**

(Funkcionisanje sistema)

(1) Vlada Federacije Bosne i Hercegovine dužna je osigurati tehničku ispravnost, održavanje i trenutnu isporuku elektronskih podataka glavne knjige registra kao i funkcionisanje sistema registracije.

(2) Isključivi vlasnik sistema registra, uključujući i verifikovane izvorne kodove i sve dijelove sistema je Federacija.“.

## **Član 23.**

(Prelazna odredba)

(1) Vlada Federacije Bosne i Hercegovine propis će iz člana 10. stav (10) ovog zakona donijeti u roku od 90 dana od dana stupanja na snagu ovog zakona.

(2) Federalno ministarstvo pravde će pravilnik iz člana 49a. stav (6) donijeti u roku od šest mjeseci od dana stupanja na snagu ovog zakona.

## **Član 24.**

(Stupanje na snagu i početak primjene)

Ovaj zakon stupa na snagu narednog dana od dana objavljivanja u „Službenim novinama Federacije BiH“, a početak će se primjenjivati od 01. 09. 2021. godine.

## **O B R A Z L O Ž E N J E**

### **ZAKONA O IZMJENAMA I DOPUNAMA ZAKONA O REGISTRACIJI POSLOVNIH SUBJEKATA U FEDERACIJI BIH**

#### **I – USTAVNI OSNOV**

Ustavni osnov za donošenje ovog zakona sadržan je u odredbi člana IV. A. 20. 1. d., a u vezi sa članom IV. C. 3. Ustava Federacije Bosne i Hercegovine, kojim je propisano da je Parlament Federacije nadležan za donošenje zakona u vršenju funkcija federalne vlasti, ukoliko ustavom nije drugačije utvrđeno, te da pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova bit će utvrđeni zakonima Federacije.

#### **II – RAZLOZI ZA DONOŠENJE ZAKONA**

Analizom stanja u oblasti registracije poslovnih subjekata u Federaciji BiH došlo se do saznanja da postojeći sistem ima niz nedostataka koji se manifestuju u dugotrajnosti i složenosti postupka registracije poslovnih subjekata do samog otpočinjanja rada. Naime, važeći tekst zakona donesen je 2005. godine i mijenjan je u tri navrata, a poslovne prilike kako u Bosni i Hercegovini, tako i van nje su se znatno promijenile i zahtijevaju značajniju ekspeditivnost u privrednom poslovanju. Zemlje u okruženju su svakako pratile taj trend dok je u Federaciji BiH situacija sa procedurom registracije poslovnih subjekata ostala nepromijenjena. Takva situacija je Bosnu i Hercegovinu stavila na listu zemalja sa nepovoljnim poslovnim ambijentom.

U cilju otklanjanja postojećih barijera u otpočinjanju rada poslovnih subjekata Vlada Federacije BiH je identifikovala osnovne ciljeve u ovoj oblasti, a oni se odnose na pojednostavljenje procedure registracije poslovnih subjekata, samim time pojeftinjenje procedure, a kroz uspostavu jedinstvenog informacionog sistema registracije poslovnih subjekata, tzv. JIB, odnosno sistema elektronske registracije poslovnih subjekata.

Kao osnovni zadaci koji se moraju ispuniti u cilju uspostave elektronskog sistema registracije poslovnih subjekata jest izmjena važeće zakonske regulative koja se odnosi na ovu oblast. Obzirom da uspostava jedinstvenog elektronskog sistema sistema registracije poslovnih subjekata podrazumijeva preciziranje tačnog mjesta na kojem će se odvijati proces registracije, a što će doprinijeti velikom broju smanjenja neophodnog broja aktivnosti i posjećivanja velikog broja institucija od same stranke, predložene su izmjene i dopune važećeg zakona o registraciji poslovnih subjekata u kojim se kao osnovne novine uvode jedinstveni informacioni sistem registracije, sistem elektronskog povezivanja svih relevantnih subjekata u procesu registracije sa nadležnim registracionim sudom. Svakako, podrazumijeva se da će ovu reformu u oblasti zakonodavstva pratiti adekvatne aktivnost u oblasti uvođenja elektronskog poslovanja i registracije poslovnih subjekata, kroz elektronsko uvezivanje svih relevantnih institucija, koje učestvuju u procesu registracije. Dakle, uvođenje elektronske registracije poslovnih subjekata podrazumijeva povezivanje svih nadležnih registracionih sudova u složeni informacioni sistem Federaciji BiH sa Poreznom upravom FBiH, Upravom za indirektno oporezivanje, Zavodom za statistiku, općinama i eventualno drugim institucijama koje budu u procesu uspostave sistema označene kao relevantne u samom procesu. Uspostavljanje ovog složenog

informativnog sistema podrazumijeva uspostavljanje jedinstvene baze registra koja služi kao centralno mjesto za pohranjivanje registarskih, evidencijskih i statističkih podataka registarskih sudova, kao i isprava i drugih dokaza pohranjenih u elektronskom obliku u zbirku isprava, te uspostavljanje internet stranice registra kao dio sistema registra putem koje je omogućeno pretraživanje i uvid u javne podatke iz glavne knjige. Takođe, treba imati u vidu da je postojeći sistem, elektronska knjiga registra koja se trenutno vodi u Federaciji BiH, instaliran 2005. godine i znatno je zastario u tehnološkom smislu.

Ova reforma omogućena je uz podršku Britanske ambasade i Grupacije Svjetske banke, a odnosi se na adekvatnu tehničku pomoć za uspostavu elektronskog sistema registracije i zasnovana je na Odluci vlade Federacije BiH o provođenju Projekta unapređenja poslovnog okruženja i pristupa tržištu na nivou Federacije Bosne i Hercegovine. Takođe, treba napomenuti da su predložene zakonske izmjene pratile obimne aktivnosti koje se odnose na uspostavu elektronske baze registra poslovnih subjekata u Federaciji BiH, pa je u okviru provođenja Projekta unapređenja poslovnog okruženja i pristupa tržištu u Federaciji BiH, kao prvi projektni segment od januara 2019. godine započeta digitalizacija sudske arhive registrovanih poslovnih subjekata u Federaciji BiH, što podrazumijeva kompletnu konverziju sudskih spisa iz pisanog u elektronski oblik, njihovu verifikaciju i vezivanje za konkretni poslovni subjekat, a što je važna pretpostavka za uspostavljanje elektronske registracije poslovnih subjekata. Ovaj postupak uključuje digitalizaciju arhive, kao i digitalizaciju tekućih postupaka registracije, te konsolidaciju podataka korištenjem postojećih elektronskih registara.

Nacrt zakona o izmjenama i dopunama Zakona o registraciji poslovnih subjekata u Federaciji BiH razmatran je od strane Predstavničkog doma Parlamenta Federacije BiH na 30. vanrednoj sjednici održanoj dana 20. 06. 2018. godine, a od strane Doma naroda Parlamenta Federacije BiH na 4. sjednici održanoj dana 19. 12. 2019. godine, te je od strane oba doma Parlamenta Federacije BiH Nacrt zakona podržan kao dobra osnova za izradu prijedloga zakona.

Nakon dodatnih razmatranja usvojenog nacrt zakona izvršene su određene korekcije, te je sačinjen ovaj tekst koji će uz određene izmjene zakonskih rješenja o privrednim društvima, kao i donošenje Zakona o elektronskom potpisu u Federaciji BiH predstavljati osnovu za reformske aktivnosti Vlade Federacije na poboljšanju poslovnog okruženja i jačanje privrednog razvoja.

### **III - OBRAZLOŽENJE PREDLOŽENIH ZAKONSKIH RJEŠENJA**

Članom 1. Prijedloga zakona o izmjenama i dopunama Zakona o registraciji poslovnih subjekata u Federaciji Bosne i Hercegovine (u daljem tekstu Prijedlog zakona), interveniše se u članu 3. važećeg zakona, koji propisuje značenje pojedinih izraza koji se koriste u ovom zakonu. Modifikacija ovog člana neophodna je zbog uvođenja jedinstvenog informativnog sistema elektronske registracije. Precizno je pojašnjen pojam jednošalterskog sistema, jedinstvena baza registra, internet stranica registarskog suda, jasnije je preciziran matični broj subjekta kao i pojam izvod iz registra koji se izdaje iz elektronske baze registra.

U odnosu na Nacrt zakona izvršena je korekcija u stavu (1), u:

- tački 4) - uvrštena je formulacija „na jedinstvenoj fizičkoj ili virtuelnoj lokaciji“, koja je bitna odrednica sa aspekta podnosioca prijave i predstavlja smisao predmetne norme. Odredba je proširena i na razvrstavanje pravnog lica prema djelatnostima koja će biti detaljno propisana u nastavku, kao i upis u registar carinskih obveznika i obveznika indirektnih poreza kada se za to steknu tehničke i organizacijske pretpostavke.

- tački 5) - za sistem registra pored činjenice povezivanja registarskih sudova i drugih nadležnih organa, čini se bitnim istaknuti cilj povezivanja - funkciju elektronske komunikacije i razmjene podataka. Naime, informacioni sistem treba omogućiti elektronsku registraciju i komunikaciju učesnika u postupku registracije.

- tački 7) – gdje se kompletna tačka briše iz razloga jer je Prijedlogom propisan poseban član koji normira internet stranicu registra, tj. član 10a.

- tački 10) - riječi „s ciljem ostvarivanja profita“ zamjenjuju se riječima „radi sticanja dobiti“ u cilju konzistentnosti sa Zakonom o privrednim društvima i Zakonom o zadrugama kojima su propisane definicije privrednog društva odnosno zadruge, a koje primjenjuju formulaciju sticanja dobiti.

- tački 11) - riječi „u sistemu elektronske registracije“, brišu se. Iz razloga jer se matični broj subjekta upisa (MBS) dodjeljuje prilikom upisa u registar nezavisno o tome da li se radi o elektronskoj registraciji ili ne. Iz navedenog razloga predložena je citirana izmjena.

- tački 12) - riječ „zasnivanje“ se zamjenjuje riječju “registracija”. Naime, riječ „zasnivanje“ u kontekstu predmetne odredbe je nedovoljno precizna, obzirom da bi trebala glasiti „upis zasnivanja“, sa druge strane ovakva formulacija nije niti potrebna obzirom da se u nastavku norme propisuje da je to svaki upis, što podrazumijeva i upis zasnivanja. Termin registracija čini se adekvatnim iz razloga što u smislu ovog zakona ista ima značenje skraćenog naziva za „upis u registar“, a kao dodatni razlog riječ registracija koristi se u više odredaba Zakona, kao i u samom nazivu Zakona, a pri tom nije niti jednom odredbom regulisana kao poseban pojam.

- tački 15) - riječi „izdatom u skladu sa odredbama Zakona o parničnom postupku ili drugim posebnim zakonom“, brišu se. Naime, nepotrebno opterećivanje odredbe pozivanjem na konkretan zakon, te druge posebne zakone. Zakonom o registraciji je naznačeno da se radi o vanparničnom postupku, a Zakon o vanparničnom postupku propisuje i shodnu primjenu Zakona o parničnom postupku.

- tački 17) - potvrda i 18) brišu se kao suvišne - obzirom da Izvod iz registra obuhvata sve tražene podatke.

Članom 2. Prijedloga zakona vrši se intervencija u članu 4., stav (1), tačka 8), i ista se odnosi na princip „javnosti“, obzirom da se postupak registracije poslovnih subjekata zasniva na jasno utvrđenim principima, a jedan od njih je princip „javnosti“. Ovaj princip može biti ograničen samo ako je zakonom isključena primjena principa javnosti registra.

Članom 3. Prijedloga zakona dopunjuje se član 5. važećeg zakona i precizira se koji su subjekti obavezni na registraciju, odnosno da su to poslovni subjekti precizirani i drugim posebnim zakonima.

Članom 4. Prijedloga zakona mijenja se član 7. i detaljno se propisuje predmet registracije.

Članom 5. Prijedloga zakona dopunjuje se član 8. važećeg zakona i dodaju se st. (9), (10), (11) i (12), kojima se jasno precizira da su predsjednik registracionog suda i nadležna služba Vlade Federacije u kojoj je smješten sistem registra dužni provoditi mjere osiguranja i zaštite pohranjivanja podataka, kao i mjere održavanja i provjere ispravnosti rada elektronskog sistema, te da se za osiguranje neophodnih kadrovskih, tehničkih i organizacijskih uslova funkcionisanja sistema registra, kao i za tačno i ažurno pohranjivanje podataka u jedinstvenu bazu te uredno provođenje mjera sigurnosti, brine predsjednik suda. Zatim se propisuje da svaka dostava podataka elektronskim putem van zaštićene mreže sudova koja kao posljedicu ima upis podataka u jedinstvenu bazu sudskog registra mora biti kriptirana i zaštićena od neovlaštenih izmjena od strane trećih lica, te da svaki prenos podataka elektronskim putem van zaštićene mreže sudova iz jedinstvene baze sudskog registra u druge sisteme mora biti kriptiran i zaštićen od neovlaštenih izmjena od strane trećih lica. Ovim članom se tačno precizira odgovornost za zaštitu i korištenje podataka iz registra.

Članom 6. Prijedloga zakona mijenja se član 10. u važećem tekstu zakona kojim se propisuje sadržaj registra, a obzirom da se registar vodi u obliku glavne knjige u elektronskom i štampanom obliku i zbirke isprava registra. Dakle, precizno je propisano kako se vodi glavna knjiga registra, te da je glavna knjiga registra u elektronskom obliku dostupna svim registarskim sudovima u Bosni i Hercegovini i da je nadležni registarski sud dužan osigurati da konačan upis u glavnu knjigu registra bude trenutno dostupan svim registarskim sudovima na teritoriji Bosne i Hercegovine.

Precizirano je da se glavna knjiga registra u elektronskom obliku vodi putem jedinstvenog informacionog sistema. Nadalje, zbirka isprava registra vodi se u štampanom, a može i u elektronskom obliku, te da će Vlada Federacije BiH donijeti propis kojim će se urediti vođenje registra, osiguranje, upotreba i čuvanje sadržaja registarskih podataka, vođenje zbirke isprava u elektronskom obliku, kao i pretvaranje isprava pohranjenih u zbirci isprava na papiru u elektronski oblik.

Članom 7. Prijedloga zakona dodaje se član 10a. Ovaj član prati uspostavu elektronskog sistema registracije i propisuje uvođenje internet stranice sudskog registra, takozvanu elektronsku oglasnu tablu na kojoj će se objavljivati sve odluke suda vezane za poslovne subjekte i način pristupanja internet stranici. Internet stranica sudskog registra je dio sistema registra putem koje je omogućeno pretraživanje i uvid u javne podatke iz glavne knjige kao i javno objavljene podatke o sadržaju provedenih upisa u registar, odnosno javno objavljene odluke za koje je zakonom ili odlukama registarskog suda određeno da će se objaviti na način na koji se objavljuju upisi u sudski registar.

Članom 8. Prijedloga zakona dopunjuje se član 22. stav (1) novom tačkom 10), a kojom se u suštini prati materijalni zakon, odnosno Zakona o privrednim društvima, čija će izmjena biti predložena u paketu izmjena zakona vezanih za poboljšanje poslovnog okruženja.

Članom 9. Prijedloga zakona mijenja se član 48. važećeg zakona kojim se propisuje podnošenje prijave za registraciju. Dakle, propisuje se jasna procedura za pokretanje postupka registracije, te se precizira da se postupak upisa u registar pokreće



prijavom u štampanom obliku ili elektronskom prijavom, potpisanom u skladu sa propisima koji regulišu elektronski dokument i elektronski potpis.

Ovaj član je modifikovan u odnosu na Nacrt zakona obzirom da se novim odredbama u daljem tekstu detaljno reguliše postupak elektronske registracije.

Članom 10. Prijedloga zakona interveniše se u članu 49. i mijenja se važeći zakonski tekst, koji propisuje obrazac prijave. Ovaj član nije bio obuhvaćen Nacrtom zakona, ali kasnijom analizom potreba uspostave jedinstvenog informacionog sistema ocijenjeno je neophodnim intervenisati u ovom članu. Istim se propisuje način podnošenja prijave u štampanom i elektronskom obliku, njen sadržaj koji uključuje i opredjeljenje za pretežnu djelatnost poslovnog subjekta, kao i potrebnu dokumentaciju za upis. Posebno je značajan stav (8) koji propisuje da podatke iz isprave neophodne za registraciju poslovnog subjekta, podnosilac prijave nije u obavezi dostaviti u slučaju kada je za potrebe dokazivanja ispunjenosti uslova za registraciju, nadležni registarski sud u mogućnosti koristiti podatke iz registara drugih organa, kao i podatke koji proizlaze iz kvalifikovanog elektronskog sertifikata odnosno korisničkog naloga podnosioca prijave, čime se postupak registracije značajno pojednostavljuje, te dolazi i do smanjenja troškova registracije. Naime, podaci koji su dostupni kroz jedinstveni informacioni sistem ili putem nekog drugog sistema neće se tražiti od podnosioca prijave za registraciju.

Članom 11. Prijedloga zakona proširuje se važeći tekst zakona novim članom 49a. koji propisuje postupak elektronske registracije. Naime, predmetnim odredbama detaljno se propisuje način podnošenja elektronske prijave na elektronskom obrascu, način provjere identiteta podnosioca prijave u skladu sa propisima kojima se uređuje elektronski potpis i elektronski dokument. Također se propisuje da u postupku elektronske registracije nadležni registarski sud donosi odluke elektronski potpisane od strane registarskog sudije i ovjerene elektronskim pečatom registarskog suda, koje se u formi elektronskog dokumenta, kao i druge isprave potrebne za obavljanje djelatnosti subjekta upisa dostavljaju podnosiocu prijave, te da svi dokumenti izdati od strane nadležnog registarskog suda u postupku elektronske registracije imaju svojstvo javne isprave i ne može im se osporiti pravna punovažnost zbog činjenice da su izdati u formi elektronskog dokumenta.

Članom 12. Prijedloga zakona mijenja se član 50. važećeg teksta zakona, a u cilju preciziranja postupanja suda. U stavu (2) ovog člana propisuje se da se prijava za registraciju u elektronskom obliku dostavlja odmah po njenom prijemu poreznom organu, Federalnom zavodu za statistiku i, prema potrebi carinskom organu nadležnom prema mjestu sjedišta subjekta upisa radi pribavljanja poreznog identifikacionog broja i carinskog broja. Dakle, elektronskim putem će se vršiti pribavljanje neophodnih podataka od nadležnih institucija i skratiti postupak.

Članom 13. Prijedloga zakona mijenja se član 59. važećeg zakona kojim je propisan izgled i sadržaj rješenja o registraciji, a zbog uvođenja elektronskog sistema registracije i komunikacije suda sa određenim institucijama, gdje se izrađuje rješenje o upisu u registar u elektronskom obliku, koje će biti dostupno ovim institucijama i time će se smanjiti broj koraka koje sama stranka trenutno poduzima radi aktivnosti u postregistracijskom postupku, posebno u dijelu registracije djelatnosti iz člana 6. Zakona o privrednim društvima.

Članom 14. Prijedloga zakona mijenja se član 60. važećeg zakonskog teksta kojim je propisan izgled zaključka kao vrste odluke koju donosi sud u postupku registracije, a ova izmjena prati izmjenju iz člana 13. ovog zakona.

Članom 15. i 16. Prijedloga zakona, interveniše se u čl. 68. koji se usklađuje sa članom 21. ovog zakona i 73. važećeg zakona. Ovom intervencijom se propisuje objava zahtjeva za brisanje iz registra i poziva za ročište, koje se održava povodom zahtjeva za brisanje iz registra i na internet stranici registarskog suda.

Članom 17. Prijedloga zakona, mijenja se član 74. važećeg zakona i istim se propisuje dostavljanje poreznog identifikacionog broja i razvrstavanje subjekata po djelatnostima. Ovim članom propisuju se rokovi za postupanje nadležnog organa za razvrstavanje subjekata po djelatnostima radi razvrstavanja subjekta upisa prema klasifikaciji djelatnosti i nadležnog poreznog organa prema sjedištu subjekta upisa radi dodjeljivanja identifikacionog broja i porezne registracije, kao i postupanje suda u slučaju da porezni identifikacioni broj odnosno podbroj ne bude dostavljen u roku.

Ako nadležni porezni organ ne dostavi porezni identifikacioni broj i podbroj u ostavljenom roku, sud neće donijeti rješenje o registraciji kojim se propisuje dostavljanje poreznog identifikacionog broja, pa se u stavu (6) rok od 12 mjeseci, koji je ostavljen za čekanje poreznog identifikacionog broja, u slučaju da podnosioc prijave ima neizmirenih poreznih obaveza, skraćuje sa 12 mjeseci na 7 dana. Naime, u dosadašnjoj praksi uočeno je da ovaj rok znatno utiče na trajanje sudskog postupka registracije, a neefektivan je u smislu stimulacije stranaka na izmirenje poreznih obaveza. Odbijanjem prijave zbog ovog razloga, ne utiče se na pravo stranke da istu ponovno podnese ukoliko izmiri porezne obaveze. U statističkim prikazima trajanja sudskih registracionih postupaka samo jedan slučaj čekanja izmirenja poreznih obaveza do 12 mjeseci bitno utiče na cjelokupnu statistiku.

Članom 18. Prijedloga zakona mijenja se važeći član 76. u pravcu elektronskog povezivanja sistema i dostupnosti odluka suda u elektronskom obliku. Jasno je precizirano kome se odluke suda moraju dostaviti, pa je pored do sada označenih institucija propisano da se rješenje o osnivanju i statusnim promjenama mora dostaviti i Finansijsko-informatičkoj agenciji, a nadležnim općinskim i kantonalnim organima uz rješenje mora se dostaviti i izjava iz člana 6. Zakona o privrednim društvima. Nakon uspostave sistema elektronske komunikacije ove sudske odluke bit će automatski dostupne svim pobrojanim institucijama, čime se znatno skraćuje postupak registracije.

Članom 19. Prijedloga zakona mijenja se član 78. važećeg teksta zakona i istim se preciziraju koje javne isprave i na koji način se izdaju iz sudskog registra.

Članom 20. Prijedloga zakona, interveniše se u članu 81. stav (2) i istim se propisuje da ukoliko nadležni registarski sud utvrdi da nisu ispunjeni svi formalni i materijalni uslovi za upis u sudski registar, pozvat će predlagaoca da u roku od tri dana otkloni navedene nedostatke, a ukoliko predlagaoc ne postupi u navedenom roku donijet će rješenje o odbacivanju prijave. Važeća norma je u smislu postupanja suda neprecizna jer ne propisuje u kojem roku će sud postupati i kada donijeti rješenje o odbacivanju prijave.

Članom 21. Prijedloga zakona interveniše se u članu 82. važećeg zakonskog teksta. U predmetnom članu se propisuje da se pravomoćno rješenje o registraciji objavljuje

na oglasnoj tabli suda i na internet stranici suda. Naime, prijedlog je da se javno objavljivanje podataka o sadržaju provedenih upisa u Registar, odnosno javno objavljivanje odluka za koje je zakonom ili odlukama registarskog suda određeno da će se objaviti na način na koji se objavljuju upisi u registar, vrši putem internet stranice registra, što nedvojbeno predstavlja ekonomičniji, transparentniji, efikasniji, dostupniji način objavljivanja. Pored navedenog predviđena je objava na oglasnoj tabli suda radi stranaka koje eventualno nemaju pristup internetu na koji način bi u potpunosti bio zadovoljen princip javnosti.

Članom 22. Prijedloga zakona mijenja se važeći član 84. obzirom da će Vlada Federacije BiH osigurati funkcionisanje sistema i tehničku ispravnost.

#### **IV - FINANSIJSKA SREDSTVA**

Za provođenje ovog zakona nije potrebno osigurati dodatna sredstva u Budžetu Federacije Bosne i Hercegovine.